

«Prontezza da collavurar per avair success»

Pled d'avertura da la sessiun d'avust

■ **(anr/fa) Ina stretga collavuraziun en il turissem grischun è a l'avis da la presidenta dal cussegl grond Elita Florin-Caluori indispensabel per dumagnar las sfidas dal martgà global.**

Er en ses ultim pled d'avertura sco presidenta dal cussegl grond ha discurrì *Elita Florin-Caluori* (pcd, Razèn) davart il tema «uman e lavur». Quest motto per sias allocuziuns durant l'onn d'uffizi passà aveva ella tschernì sco ch'ella ha ditg per render attent e sensibilisar per l'impurtanza da la lavur. «Avair lavur e dastgar collavurar, quai è per mai la furma d'appartegnientscha sociala la pli impurtanta», ha ella accentuà, «da s'engaschar sin plaun politic per la lavur e per cundiziuns da lavur gistas sto perquai esser ina finamira politica prioritara, e quai sin tut ils stgallims statals.» La presidenta dal cussegl grond ha menziunà la bella stad passada cun ses success per il turissem chantunal. Per il futur èsi a ses avis essenzial ch'i dettia ina stretga collavuraziun en l'economia turistica grischuna, ch'i vegnian realisads unidamain novs projects en spezial per il turissem da stad. «Quai cumpiglia per mai però er l'integraziun

da la populaziun indigena», ha ella punctuà. Questa collavuraziun è a l'avis da Florin-Caluori in factur clav per avair success en futur. In ulteriur factur clav gist uschè grond è tenor ella la prontezza da la populaziun indigena da s'engaschar sper la professiun per ils interess da la vischnanca e dal chantun: «Cun noss sistem da politicras e politichers da milissa avain nus cuntanschè, ensemen cun la regenza e la populaziun, in aut grad da stabilitad politica.» Ella ha menziunà ina tenuta che s'haja dera-sada adina pli fitg ils ultims decennis e che ad ella na para betg in bun svilup, numnadamain da metter ils agens interess sur tut: «Mo sch'i dat umans avun-da ch'èn pronts da suttametter ina part da lur interess privats a la chaussa cuminaivla avain nus ina schanza da dumagnar ils problems ed ils projects da nosa societad e da nosa economia che d'avan- tant adina pli complexs per nossas plazzas da lavur e noss chantun.» Elita Florin-Caluori è persvasa ch'il sistem da milissa saja ina pitga purtanta per la politica grischuna, l'economia e la stabilitad: «Da quel sistem stuessan nus avair quità er en l'avegnir.»